

四庫全書

集部

欽定四庫全書

少谷集卷三

明 鄭善夫 撰

七言古詩

朔州行

朔州城頭凝黑雲朔州城下邊人魂健兒悍驕好殺戮
少壯戰死今無存悲風南下吹簫簫馬逸飲血太白窟
不見鐃歌入塞門但見人骨白萃律近來衣冠苦出粟

豈說千朝養精卒班生介子不應募願弄悲笳令歸去

時逆瑾罰廷

臣入邊儲

雨

黃埃莽莽二麥死幽天五月無雷雨
祗疑青竹修大雩忽見黃頭澤下土
少男風生鳥鳴渚蒼龍行天翠蛟舞
兒童拍手歌蜥蜴微歛從茲脫箠楚
廼者盜賊連三霜以致逆氣成旱荒
老稚大半委溝壑丁壯豈免從豺狼
况爾犁鋤鑄為兵縱有廢地無復耕
東家鬻兒西鬻女

骨肉之怨何時平只今一雨民稍寬柳葉榆錢尚得殮
莫令邊陲又金革公賦從容私始得

古劍行贈仇將軍北征

將軍手提三尺冰乃是鬼國之鐵大齒之珎滄溟水枯
淬不成莫邪斷髮躍冶死而後龜文漫理流天晶霜鋒
閃爍驚鷄凝萬金吳鉤拖頰纓北斗七宿土花發青天
寶匣迴機衡斬蛟斷犀俱細事此物自是蒼龍精江翻
河反罔象急提出白曜搖東溟飛芒殺白帝喉下不可

嬰豐城古獄誰識女斗牛之墟元氣升沙塞秋高塵壓
城黃龍白狼不肯庭山甫無人武安死戰馬西向徘徊
鳴安西都護君好行此物應世世當平丈夫叱咤鞭風
霆國難不赴非俊英劍乎劍乎吾與女同死生

林員外東甌斗城圖引

連山蒼蒼若星宿大江孤嶼象雲構我行東南未見此
云是東甌斗城子巽吉仁王柄東指松壇華蓋魁堪擬
西山岩崑作領袖就中陳迹無不有前有王將軍後有

謝太守白雲春草蕪沒久墨池歲歲生芳茆自有王謝
經行處至今景物無塵垢紹興以來產俊英周劉鄭薛
次第興咸淳之上二百載醇正無過王龜齡要皆山川
所毓秀亦自守者善造就林侯風流士直駕王謝後賓
御盡才藻形勝布篆籀功成北首誰與娛但寫江山入
畫圖行邊似防百怪出耳畔長聞海波入駐鶴亭吹笙
臺更有鴈蕩四百峰崔巍千年陵谷辭劫灰我生胡為
處溷濁明日黃冠歸去來

小岷山歌

君不聞小岷之山連胃婁雄視西川十二州
青天萬古走蜿蜒峰迴嶂轉無時休
劍門峨眉名失勢白帝烏鼠俯之如浮漚
上有許由瓢世人不得用直挂月戶三千
秋蒙泉瀉天奔龍湫已溪浚浚學字流湫
騰入汶江萬里滄溟收山中老桂色不滓
芝草琅玕爛成綺洞口長回聲利車盤石
但坐煙霞侶宋有蘇長公隋有劉仙子
探芝斲桂樹長鏡亂雲裏小岷山巉巖
不可攀劉蘇以

後人迹復不到迺有曾東石架屋讀易於其間平生負
此滄海志少年訪道青城山上餐青城絕壁之流霞下
弄岷峨陰壑之潺湲黃熊蒼兕不敢迫猿狖叫嘯情自
惟空谷無人行蘭草復翻翻竭來遊人世十載愁朱顏
吁嗟乎青山信美蒙泉亦可以洗君耳君胡爲乎城市
許由之瓢欲何俟終南有捷徑北山有俗軌玄猿獨鶴
煖眼冷眼遙看爾紅塵白馬有何益柴桑不負陶彭澤
歸來乎曾東石

天津同王劉二子較射西營因賦長歌

病夫平生滄海情南征喜得王時行天津橋邊秋氣清
邀我醉遊劉伯耕投壺叫白意未已乃復較射城西營
劉君膂力信莫當控弦運肘固所長王郎生長在南方
亦能左挽五石強調弓坐使猛獸伏矯矢豈有飛禽翔
當場角勝不相降神臂拍張人堵牆伶人考鼓輿臺走
白日冉冉迴精光鋒翎衝撞氣益揚觀者顏色歛沮傷
熊渠以上合比數拔勝之輩斯尋常病夫雖然力不足

見爾誰能分碌碌騰身即把忘歸接引手轉被繁弱拘
沉思重自咎百罰敢辭辱忽憶先皇時此技何曾錄承
平却作凶器比喪亂始識文事踟乾坤比年氛祲厚幽
豫青徐虎狼吼專城將軍習逃走遂令死者十八九至
今楚蜀猶未夷六軍雖衆能者誰轅門衣冠更寬博教
場藜莧成町畦吁噉王劉學孔子反有餘力從事此幸
須為國收多壘吾聞茲藝德之輔匪直區區為閱武君
不見矍相圃公罔之表揚解語衛昌蒙羿巧弗取射乎

射乎吾愧汝

汶上對月聞笛作商調哀切命船人度曲為和因

賦醉歌

焉者八月高風起鴻鴈羣飛渡淮水月下清砧愁遠人
天涯芳草思公子王郎哀時最蕭瑟萬里迢迢向南國
呼我上船設冰鱸仰天頌酒開胸臆關山茫茫何處邊
但見急管哀中天馮夷聽曲波面出楊柳亂落西風前
酒酣月落歌未已隴思江情嗒然起未掛姓名玉策上

願添海水金樽裏人生合歡那可測有似大海翻萍葉
回首親朋各別離豈無江漢通舟楫流光過鳥不復駐
達官好爵身之蠹况廼豺狼橫地軸何限驂騑窘天步
竹林諸賢皆酒徒嗣宗只願步兵厨古來賢達一澌盡
醉鄉之托今何如

憶弟

去年蘇臺送汝歸布被獨卧愁依依畬田力薄霜雪厚
憐汝受凍仍啼饑北有鴻鴈南鯉魚但見風塵不見書

深林大道防豺虎萬里看雲涕如雨

猛虎行

玄陰冥冥天欲雨蒼兕嗥風劈林莽磨牙下山天為愁
白日殺人如捕鼠我忽聞言仗劍出彎弓却射白石入
吁嗟鳳麟無時來故使此輩為民菑不然驅汝渡河去
河北蒼生非草萊

鍾吾行

皚霜凜凜顏楊柳鍾吾驛前白狐走山東虎穴已盡除

淮北人煙亦何有自從天狼犯東斗殺掠如山如拉朽
四溟兵氣寂不揚縱有城隍誰則守黃河無梁葦可渡
曷不去此甘為虜就中一室三十口那得孤兒應門戶
投生避死誰不知鍾吾令長實主之

桃源行

黃河水盡蛟龍馴桃源沙飛愁殺人東方亂後再反覆
憶昔過此增煩辛扁舟困頓不得攜賊壕只在河東西
路官邑子微服走大屋高門狨獍啼到今事定還是非

請問流民歸未歸

行淮北戰場

我君渡淮水倉卒見賊壘一聲金鼓鳴馬躍昏風起三
千義兵坐倒戟一日同赴黃河死嗟爾漁樵人何曾識
蒐狩但聞鶴唳膽已落乃使執盾從敵後邊頭將軍故
縮手要取金印大如斗淮陰寡妻啼向天遺恨東行劉
太守

遊子

桐江水清石可數遊子思歸作漁父空谷春深記薜蘿
長途日暝憂豺虎入林何曾見赤雀結舌詎可賦鸚鵡
皇天反正誰則知有客哀傷重延佇

去年行

去年狼山北風緊斗間坐見狼星殞南下旌旗若震電
東奔盜賊如蓬粉皇天厭亂欲大誅爾輩曷早為身圖
好趁天兵未臨女即銷鋒鏑作農夫

兵馬行

越南諸州復召募滾滾盡赴桃源戍鉦鼓聲填滄海鼉
旌旗色閃扶桑樹櫓槍耀芒犯女斗虎豺也更能咆吼
部伍存亡不可知擣衣愁殺閨中婦天寒野營雪嵯峨
指墮未易親干戈幾時奏凱標銅柱願得將軍似伏波

百憂行

自我結束出門時正值世路多艱危匪才被蒙主司錄
壯圖恐負平生期刑臣干紀作厲階此輩乘勢為狐狸
朝中衣冠死極枯意外括索空茅茨君門萬里不可測

虎豹九關那得窺所以流殃遍海岱使我積憤齊峨嵋
一時安化起作孽敢睨神器寧無詞山東鐵騎皆王臣
亦忍弄兵於潢池高祖社稷豈易改孝宗惠愛無孑遺
所賴天子開神聰大加顯誅不復疑繼是諸賢出補苴
至今萬姓猶瘡痍朔方三邊屢入境桂林羣獠長勞師
意者蠻貊本梗化雖在平世亦若斯荆巴乃是荒服內
五載恃險夫何為要之三將愛生事民瘼肯與朝廷知
遂令赤子化魑魅乳臭小兒盡緋衣沉聞村落吏捉人

比併只為供軍需去年華林覆大衆今年桃源殺偏裨
乃者狼兵豈得已所過慘於熊與羆四方郡邑所召募
紀律不一皆逃歸以此公私厭金革廟議復欲為羈縻
安得一下罪已詔民得粒食莫為非

歲晏行

烏龍山頭鴉亂飛客子迫歲憂蒸藜桃源餘孽幾反覆
玉山一路方塗泥黃雲阨關鼙狄啼前有戈鋌後鼓鼙
十年通籍何辛苦猶自飄蓬負老妻

臯魚子

陟阿丘以風白楊搖搖朝暮中
烏棲白楊樹飛過阿丘
宮臯魚子抱樹啼為我問終風
何事無已時父母不得
養兒心亡絕期兒心有絕期
木華落盡風不吹

今辰行送張敬中

巽所

今辰何辰秋復暮黃花欲吐且未吐
越王臺上風不迴
謝女江邊葉如訴征途遙遙不肯住
歲晏天涯向何處
冀北能無屬目雲
閩南曾見傷心樹
憶昨秦賦大明宮

綈袍布被斯夕同于時公壯我尚少許身奚啻登夔龍
黃塵白日兩相蒙世事變履真太匆十年風波苦汎梗
一旦鬢髮成飄蓬阜鵬飛來意急香龍媒跛足眠芳草
勛業空嗟明鏡中巾鞋早向荒山道公今走馬黃金臺
黃金安得如山堆自信材官少貧賤豈有志士久塵埃
石田豆苗半枯死余獨憂勤弄煙水劉向何心厭簪紱
管寧薄命甘泥滓他日西方相憶無北魚南鴈徒為爾

大水歌二首

閩州五月雨不歇劍南諸溪水俱發溪邊樹木纏風雷
郭外人家走魚鼈野老惟憂禾黍歇尾閭不見波濤泄
君莫恨去年前年雨水絕越王臺下江流竭行人道上
思飲冰古井鹽花白於雪

其二

玄陰冥冥噎不通五月六月皆天風雷霆嘯海鳥兎急
田野盡在波濤中南山豆苗沙壓死東畝禾頭半生耳
志士寧辭溝壑填農夫自此生事已君不見無諸城外

鬻幼男今歲誅求豈但三

獨樹篇

豫章之山盤盤乎截業而倚天石壁萬仞荒智虛雲煙
上有獨樹風雷纏輪囷偃亞黛色古百圍竅穴譟吸藹
突飄風傳孤根入地幾百尺云是蘧仙手植距今三千
年內注沆瀣華外盪日月光枝翻浪湧子墮金香自是
靈株颭飛動天鷄海鵲空多夢白日影倒彭蠡陰黃昏
聲壓香爐重千峰遠意含太和萬木豈敢爭嵯峨霹靂

空中下矢石洞庭無地浩然風波茲木結踞其如何大
厦長年急梁棟心猜目眩今猶多君不聞上古有大椿
萬六千歲為秋春精英幻化那可測至今世有青牛君
茲木無乃是不然何以有此垂天之蒼雲山樊古栢相
蔥菁早晚移根天帝庭修條思在雪霜外肯與衆木分
光榮柰梨楸桑亦蓊鬱掊擊拆泄豈辭辱商丘之樗曲
輅之櫟非不巨且齒拳曲軸解徒為爾吁嗟乎豫章獨
樹何神哉安得長梯倚天畔上採附枝下柱明堂摧

君莫疑行送道宗赴闕

長歌一曲楊柳枝短歌一曲青雲詞近前勸君君莫疑
男兒不作兒女態所貴國士當酬知與君俱非年少時
桑弧蓬矢何當遺腰間環珮光陸離取媚泉石非其宜
留侯只掉三寸舌黃石將略真王師寧戚車下鳴聲悲
風塵漫漫縑短衣五穀大夫百里奚世主不識終塗泥
英雄所耻比草木且復俛首就羈羈故國萬世尤神奇
安能鬱鬱久居茲子雲寂寞空守雌屈身伸道非君誰

君知鴻鵠合高飛一翥萬里無天涯短枋香稻藏罌
弋人慕君君不知閬風玄圃便棲止慎勿下飲於塘陂
於乎慎勿下飲於塘陂

衡山高贈周公儀方伯

吾聞天高不可升南嶽上應天璣衡絕地七千五百丈
祝融之峰最巉嶒乾坤開闢自古綱維平三山西北六
鼇死然後陽門反戶東南傾巔空過日乃有此巨鎮儼
如天王神武虎臣矯矯來干城離宮富炎德桂樹常冬

榮若非崑崙西起占樞紐泰山之外誰當南嶽之縱橫
芙蓉石廩勢騰擲雷泓風穴聲礧礧七十二青蓮一一
凌紫清行雲膚寸合呼吸遍四溟鴻鴈高飛不能過嗟
爾鶴上人胡為抗行雲而上征回風瀟瀟吹古雪倒翰
七澤流三星瀟湘如系淪洞庭君山萍漂一點青累臣
帝子不可以招而返兮但見蒼梧慘澹鼓瑟悲湘靈吾
聞地有五嶽猶天五行衡山萬古合崢嶸日南天闕儻
或折尾閭汎溢地道何由成吁嗟乎祝融馭無極朱鳥

來有憑夫何為乎絳天芒熖炎海波濤驚天生豪傑須
爾用五嶽四瀆備爾形彌綸藩翰豈比塊然者不然天
將誰使之清地將誰使之寧周夫子崇高遍博要如此
平生意氣吾與爾

歲暮集林中丞宅

中丞華堂集衆賓金杯玉盤興未了尊前羯鼓催落梅
醉後佳人媚芳草洛波二龍卧已深睢陽五老歸應早
座上狂生感歲華銅龍咽月霜天曉

涵江寄伯固

囊山十里涵江市不見涵江見溪水溪邊柴門占青竹
市上高樓夾蒼梓市南故人黃省郎後峯自壘對茅堂
一旦相思輒命駕豈無消息到君傍

麥斜行

今我不樂遊麥斜石田瑀草搖春華洞門玲瓏駭初見
細路窈窕行未涯是日春光正駘蕩黃鸝布穀聲相向
遠樹蔥青色已齊古木詰屈神猶壯巖下山翁供酒鋪

賞心豈復憂行厨雲端儻遇林樵谷為爾分張石室書

再題望夫石

登彼關山望君來歸朝朝暮暮君不來歸襁中兒女大
日久無完衣泉水滔滔不入山男兒出門良獨難今時
畏途相戒蛇豕相殘欃槍苦未滅君身無時還君身亮
自惜妾身無羽翮思心從君安可得晨興望君暮化為
石

芝谷歌

商於黃公人不識獨卧空山候秋石紫芝風香吹滿谷
渚蘭汀芷無顏色兒童對客歌白雲此曲人間那得聞

玄明宮行

君不見玄明宮中積金碧云是權璫結真宅貝闕憑陵
上帝居彤臺照耀長安陌凋龍鑄虎歛飛動至今赤日
風雲黑崖壑天開朔漠搖鯨鯢日吼滄溟仄探竒祇見
靈怪集矯首翻詫星辰迫西國祇園應渺茫六朝蕭寺
空千百白龍胡為作魚泣想爾當年勢輝赫土木經營

動四方珍奇聯絡來重譯分明造化出其手左揮右霍
何不得欲將燕市作蓬山便有神人為驅石奸雄到死
竟不悟驕奢之未無終極氣數相乘可自由李猫趙鹿
空回頭君不見大市街頭權倖路古來蘼粉誰曾收

雪山歌和薛君采方思道

君不見南宮少谷老麻鞋布褐色枯槁萬事都歸混沌
裏一生但結江山好未即乘牛函谷關尚須跨馬長安
道長安歲暮雪滿城甃雪便築山崢嶸巖叢踞地虎豹

急星躔斗轉山河明玉女峰前瑤作臺夸娥一夜輕移
來袍笏真當米芾拜詩篇數荷鄒陽裁階墀把玩已兩
月皓氣遥遥正相得塵土誰分水雪安市朝聊寄煙霞
癖未妨頽舅旋補葺時見消融勢尤岌嘯月長聞白鶴
回含風豈恨青陽及青陽青陽謾相放金石瑱瑱本波
浪適來天地入虛無何事么麼論消長

鞠歌贈思道

垂桑弓挂蓬矢旦夕如長鳧誰將哺爾烏來啄粟飛入

網羅將爾含哺向淳沱河水灑灑黃沙淫淫琴絃自有
心翻奏山水音流響入明堂錫爾龍鳳章但得龍鳳章
不願尚書郎持歸報爾父母父母之恩安可畢歌黃鍾
鼓朱瑟高堂沉沉射紅日

東滌柴門歌陳執之侍御席上與思道同賦

瀛海之濱龍門高萬峰廻合相騰迸歛忽雲氣隨六鼇
沙蟠石走地不毛八水東飛滌其下青天白日風雷號
蛟龍窟宅掀夜濤深不可測安可撓天吳海若長周遭

豐隆雨師爾所操上天下天直頃刻沾灑后土如流膏
東海仙人騎赤鯉翱翔盡決三千水下憫濁世意未已
六龍鞭策風雲裏神功一歛容一指太虛不動民安止
柴門蕭蕭水之涘但見金波墮潭底世人不識柱下史
曾進當年圯橋履余也青雲一畸士袖中三尺龍之子
只今溼落甘泥滓乾坤不交國士耻有往必復自此始
惟願爲雲逐君起

思道屋為暑雨所破為作破屋歌

南州暑月氣正溽伏雨衣裊盡如漉朱方轉東熱更酷
渴想宮冰與夏屋不應天氣反北行苦寒之地炎蒸沃
長安敝廬淫雨裏上漏下濕寧安宿方子新顏寵鶴亭
鄭生亦失窮援木郎官俸薄食指繁原憲終辭九百斛
伏金未伏火未流虞書歷象今難讀安居美食古所賤
陋巷簞瓢分須足洛陽杜鵑濕不歸願得羲和宅暘谷
徐瑞卿給事所藏仲姬墨竹引

田郎掉臂登我壇手持一軸青琅玕云是仲姬真蹟留

世間徐卿得之歲應寒煙波淋漓灑不乾蝸腹蛇跗古
所難風梢露葉僅尺許遠勢翻在青雲端燕山六月雨
不止暑氣如焚汗如洗那知此君入我側便有秋聲落
吾耳偏側未枕洞庭流虛無更憶瀟湘水君不見洋州
文學士渭川千畝不盈咫筆鋒取自心眼底但見鷹鷂
隨兔起又不見前時蕭協律能工水墨古無匹疎寒不
作筠粉態瘦勁獨得蕭韶質蕭郎丹青久絕筆洋州韞
材誰祖述勝國諸賢各擅場只數仲姬入其室至大由

來二百春墨痕纔素看猶新得非尤物自有鬼神護無
乃好事者摸擬希其倫於乎貌物非物人非人天地亦
到么麼津徐卿畫本且莫論眼前萬事誰偽真

南唐後主畫竹引

昇元閣上作賜宋齊丘

君不見彭城彭奴元姓李早入徐家稱帝子又不見九
華山下齊丘生晚入南唐作謀士同時契合風塵裏草
昧君臣若魚水淮北初收格鬪塵宮中漫得丹青理昇
元閣上寫墨竹翠篠蕭森鳳毛起手書珍重表恩殊御

墨淋漓濕桑梓世代相催猶夢幻金陵畫餅寧復爾帝
王從古多好手人物絢素無不有前有殷武丁物色惟
傳傳巖叟後有宋道君鷹犬驛騶歛飛走丹青意氣稍
或別治亂興亡一回首彭奴彭奴聽我歌淇水才賢本
衆多但惜九華山不似傳巖阿吁嗟乎竹花零亂歲蹉
蛇鳳凰不來將柰何

白紵歌二首

白紵歌白紵舞吳趨青童越素女翩翩綺縠鸞鳳舉流

宮轉徵清激楚玳筵瑤膏君莫忘卿雲燦燦世將昌
赤日時下舒以長令君黃耆樂無疆

其二

蘭陵白紵色勝銀裁縫舞袖當上春調箏考瑟宴嘉賓
送意尊前未敢親東方將明樂不違主人歡笑客忘歸
鐘鼓齊發且復希矯視雲端雙鶴飛

太乙山歌

吾聞終南太乙峰迺在於天都陸海之中巨靈鼎負與

天通丹梯直駕太白窟金精反射蓬萊宮西南爾是華
夷關日月平視如跳丸但見黃河涓涓下霄漢齊州九
點翻波瀾鼇掣鯨掀勢何勁三星不度龍沙暝華岳峻
嶒徒自雄漢陂益益虛相映山中之人負自奇驂鸞翳
鷗凌雲遠袖中劍器撥時危林猿臯鶴且莫疑君不見
衛叔卿白鹿雲車謁天子問之不答意何長興亡已落
紋楸裏留侯談笑用漢帝功成麟鳳誰能係孫登長嘯
蘇門山聲似黃鐘動天地達人修身俟世至得薪用光

始有濟才多識寡嵇叔夜爾曹寧免今之世吁嗟乎終
南太乙長崔嵬虎視龍興安在哉霸王賢達俱塵埃峰
頭儻結三花樹從爾黃冠歸去來

題呂紀畫鶴

國朝畫禽誰最精四明呂紀推獨步貌出青田一片影
天機物色生毫素霜翎藻質何翩翩月下蒼虬欲上天
半夜狂風吹碧落揚聲直徹廣寒邊鳳凰不來猿鶴悲
似憐獨立羽毛稀若遇遼東丁道士聯襟接翼與同飛

畫山水引

天風盤松翠蛟吼白浪浮山蒼兕走月落未落光射空
道人夢在滄洲東雲冠雪氅烏皮几皓首相從只黃綺
我亦天台採藥師為君更話蓬萊水

一槩散人歌

君不聞漆園傲吏稱上仙商丘之槩人共憐棟梁繩墨
祇須論散木不有全天年林夫子一代賢揚輝飾智君
不然有才耻與短世用滄溟卧處洪波無邊手握青玉

芝暢歌雲和篇奇氣不可秘吾嘗得君于三狼之紫煙
拜君牀下稱豎子大兒小兒安足傳酌君酒將君髯乾
坤盡納芥子裏大道之下聖蒙融晦俱茫然掌中樗樹
大莫擬附枝屈鐵龍夜起

長歌行

南湖谷老誰識爾被褐裹頭卧桑梓早時讀易編屢絕
直道如絃仕三已郎官十年窮不休八口羞稱折腰米
虞廷咎夔苦夢寐前代君臣若魚水老驥伏櫪志千里

緇袍百結吾不恥魯生甘守白茅屋張良還從赤松子
洛陽少年抱區區漢室規模叔孫禮嗟哉往事誰向語
惠施無人子期死鳳凰樓下黨錮成濁流豈但十一士
君不見申屠蟠滅迹煙霞裏又不見郭林宗涉世終泥
滓滄江日落歸去來東山草堂安在哉遲清亭子風拔
顏貧賤如此令心哀殷王中興圖逸才孰為霖雨為鹽
梅終日畚鍤歌徘徊於乎終日畚鍤歌徘徊

題趙子昂林木

元朝學士宋家子手得丹青古莫比
筆端點染入精妙
心上經綸乃如此
唐之畢宏宋郭熙
林木山水那兼美
一匹縑素動數旬
工夫細膩世絕倫
未論意象補造化
已覺氣勢生風雲
眼中蛟龍相盤拏
風雲變態何詫嗟
草間莫着王孫足
王孫芳草今天涯
君不見馬遠區區
念宋家殘山剩水
胡為耶

遠如期

遠如期黃道亨
聖人繼天麟趾來
臻麟何以來時將太

平黃河千年而一清四序遵軌轉玉衡日之方中破幽
冥美人來騑樂我民生琴瑟不調絃當改更遠如期把
君熊軾飲君兕觥美人哉治載成行哉乎願我皇帝壽
萬年匪荒寧

復嘆三首

我生四十無聞時已暮三年角巾守煙霧空村落日門
不開獨抱鶉衾哭窮路麒麟趾折龍馬杳世俗那得知
其故嗚呼興衰用舍總在天中夜擊劍心茫然

其二

憶昔金閨困天桔乞身還山思維谷頻年藜藿口不充
況復呻吟卧牀褥生子當如孫仲謀豚犬區區但口腹
於乎天時人事兩不值我生安命而已矣

其三

歸來來歸愁復愁潔已不及滄溟流苦逐獼猴逐山雪
眼中蕭蕭誰故物天涯良友半槁死我身雖在空皮骨
於乎青山伐木鳥嚶嚶胡為使我無友生

傳木虛報與諸君問余疾苦不至口述嘲之

善夫卧病將月餘死復不死甦未甦晨昏咆哮向天呼
藥物丘積恨未除昨日傳生來報予言拉諸子過吾廬
聞之頓覺眉頭舒喚取庖人飭賓廚奚兒舉網更捉魚
餉核已具音全虛病夫延頸直到脯柴門不見君子車
裘羊徑草今何如嗚呼自古友道勝妻孥生死不二方
丈夫疾病望爾來相扶

岳江樓觀漲送馬子莘北征

霖雨五日風不迴百川流沫連山來洪濤拍天浩蕩而
崔嵬驅沙走石龍門開白日不到地滄江一何哀三山
反在八水下一葦阻絕天之涯與君起登江上臺節物
感我曠士懷六龍行天太陰死妖蛟孽虺胡為哉蝸皇
功虧禹德衰吾恐地軸今將頽短歌微吟為君起丈夫
壯年要為者何事請君起長楫共擊三千水

苦節行

過漁溪聞前王王文奎之女詹氏少婦死節為

之泣下作苦節行

下南四郡三郡兵閩盜此日真縱橫安溪莆口備慘毒
殺氣上冒天為腥六師不發無戰情賊過一程移一程
兵驕將怯往必敗疆場之事誰曾經官軍畏賊遠護送
民兵不教將何用坐遣羣羊啖虎口萬姓何辜死無訟
前王少女不就虜抽身抱石沉江水詹家少婦賊殺姑
罵賊不屈同姑死我歌苦節行淚下哽咽悲不止吾輩
堂堂七尺軀況作男兒把天紀清風嶺曹娥渚長使志

士哀千古吁嗟予詹家少婦前王女

傷哉行

宿涵江聞賊盡得王莊諸婦女惟王元德之妻
守節二十八年抗死房闔中作傷哉行

傷哉乎尚陽之南廣業之里千數茅茨變賊壘殺人成
丘山旬月不見官軍至我思八閩十七衛太祖以來食
盡多少官倉米一朝緩急不得分寸力惡用飼爾民膏
髓膾風吹塵污詩禮安能一沃滄溟水傷哉乎埧頭山

新渡嶺婦女不行刃加頸新渡嶺頭山黃金滿意婦
女還可憐蛾眉七十二竟無一下清風灘死生在前良
獨難傷哉乎前王寡妻獨死房帷間令人苦憶大古時
上有堯舜下皐夔契敷五教張四維稷播百穀民忘饑
九州分理十二牧天子端拱而無為四凶既誅戮六合
歌雍熙耕且讓畔行讓路重門暴客從何來嗟彼盜賊
豈無民彛犁鋤化兵誰使之傷哉乎聖王不作吾已而
東歸行送殷先輩

關風吹江江捲素雲脚如霾暗前路陶河捉抹應有求
絡緯追秋不知處江南江北氣蕭騷十家九家聞叫號
嚴城白日森長戟粵客中區折大刀道傍寡婦向人訴
自從亂後多愁苦夫主從戎去不還大兒又在軍前死
小兒九歲嬌且痴母子投生中道離向來喪亂饑寒在
到處蟲螟耕織稀吳門一杯天為悲送客那堪此道歸
塵煙海內還消息兵革滄洲有是非東土酸風射客眸
頻繫為我薦髑髏戰場斷骨今收未古道腥魂招得不

請君勿田太山側山樊豺虎多如織請君勿釣東海濱
天吳九首飛殺人請君莫叩函谷關只今長夜正漫漫
為君生計謀不得一夕籌心鬢毛白

題官竹

黃河之水非淇澳亦有鐘籠挺平陸彭城官舍清如簇
礫砢紛披成綠玉使君公餘閒鼎餗清聲入坐可無肉
酒酣戲我題官竹座中才子謝水曹對客跳躍先揮毫
詩成奪我宮錦袍行輩大叫稱詩豪我憐此竹絕短小

忽有感遇難成騷點與語曰汝之生也不似簪帶排青
蒼安能截作笙簫來鳳凰又不似由衙大如斗惡用於
汝為柱梁惟應托根官舍傍且有標節儲雪霜中虛不
肯容螻蟻作德君子多此方噫華滋爛死兮汝得孤存
劫火滿山兮汝獨不焚子猷云何可一日無此君吾欲
移汝歸崑崙

玉華山歌贈盛太史端明

玉華兩峰天下雄力障碧海東龍從峰頭偃蹇千尺松

停霜冒雪蒼苔封松根飛瀑聲淙淙流入韓江秦虬龍
徵君結屋浩渺中開窗下瞰馮夷宮角中一幅雙鬢擊
玉華相對為主翁酒酣擊筑詠古蹟韓山越埒啼猿狖
小桃溪春深淺紅有時鶴馭來偓儻月明小艇西復東
富貴於我如飄風鴻鵠高飛不可籠羅網繒繳難為功
去年闕下見一鵠今年天際冥孤鴻嗟予羈的未解脫
驚蹄捷徑愁恍恍亦有靈源似玉華茅茨傾倒登罷熊
安得脫身若鴻鵠萬仞峰頂時相從

秋夜過虎丘與方思道坐白蓮池石各賦一首

夜入虎丘山露坐白蓮池秋月淡淡開連漪秋風嫋嫋
吹葛衣月中歌聲過雲起雙翮忽欲乘風飛慙慙泉甘
如飴一飲數斗療我饑可中亭上鳴參差希音嘹亮明
者誰方思道鄭繼之二人瞰世同一機今時莫道無鍾
期吁嗟乎太行之路多嶮巇煙塵障天咫尺迷壯志於
我夫何為五斗米焉足縻南山有蕨藜北山有紫芝歸
乎歸劍池蛟龍久不起生公法石至今疑來日大難知

不知願言將子顛冥於武夷

遺太白山人方鳥歌

道人昔年屠赤蚪蚪革中作雲錦裘授之素女製方鳥
精比南海之輕綃鷗冠鶴氅言好速未有售者微其儔
余知尤物終非世所畜化作雙鳬飛去從王喬低五嶽
小六州遊汗漫三千秋更欲乘風觀十洲掉頭太白山
悠悠饑食聚窟霞渴飲清海漚赤霄九萬去一息戾止
豈負樊籠憂漢網恢恢羽獵愁雙鳬雙鳬何處求我亦

從今理風翼覓汝于崑崙頂上之椒丘

登七十二峰閣歌

吾聞太湖東注三千水乾坤納納幾萬里東西洞庭天
際起七十二峰如聚蟻青天白日飛雪雨兵塵慘慘滿
人間故國何處愁路難五湖多風不可渡入山魑魅相
依附若為化作鴻冥冥南向峰頭結煙霧終焉身重飛
不得展轉湖邊倚高閣湖昏閣靜百感集悵望毛公謝
烏鵲嵩高西去尋靈藥

題望夫石

自君之出西玉門寒砧夜夜驅離魂樓蘭未滅君不歸
淚眼一注窮崑崙自紡自績孰與存眼青直到天地昏
城中少年生情性一曲離鸞豈堪聽妾身自是藍田璧
寧向峰頭化為石海水屢見成丘山猶望夫君生八閩
呱呱小兒尚在手白衣蒼狗無不有誰家去夫贖出醜
世上婦人多姓柳

黃茅岡和東坡二首

雲龍山下黃茅岡，秋風破帽聊相羊。
徐州太守遺石牀，煙花十萬皆微茫。
白龍帝鄉千里長，有客好事還相望。
高歌不乏太守狂。

其二

我醉倚歌千仞岡，一聲叱起萬石羊。
寒笳數聲咽胡牀，四山烽火何茫茫。
道路阻絕煙塵長，京華咫尺不可望。
小子年來學狺狂。

東征

大風從西來行子向東去黃塵十丈強沒盡傷心樹匹
馬追風不受鞭長安回首思悠然城頭笳鼓晚來急村
村寡婦當簷泣

鷓鴣行

行人行人子細聽鷓鴣近前語分明山有長蛇兼罔兩
水若可涉霜濤驚哥哥欲行須蹙停君不見赤雉四顧
不出山虞人關弓射雉還君不見大鵬搏風九萬里六
月一息圖南徙

早發臨安

東閣冬月西關西仲冬雨雪水復微去年今年風色惡
大有小有人煙稀於潛諸縣討大賊軍旅之后多蟲蠖
意外征求莫大繁今日蒼生合蘇息

大游篇贈高宗呂

登山須騎五色羊涉水須泛無倪航一身之小四海遠
紅光瞥影明煌煌年少離居歷寒暑孤鳳冥鴻自高舉
東封碣石入羅浮十洲山水猶能數世人未斷區中緣

頑腹無腸萬愁貯炎趨聲利赴火蛾戀食癡鷄嚇腐鼠
吁嗟乎吾求此輩無其曹條然六合解天弢上乘灝氣
懷宇高丹山碧水相週遭仰天大笑秋蕭騷九州熱客
從滔滔高生高生縱遊遨

石梁行

陰厓鈇斨氣溟濛山木慘切悲回風石梁駕天蟠彩虹
飛流下擣龍光宮上仙之都弱水東彼岸可度天之功
十年尋仙志未已台嶽欣逢羨門子願君啟我元命秘

荷鏡拾茅吾不耻桃源洞天春色多
爾時劉阮今如何
慈竹引二首

北堂慈竹連理枝青陽含惠流綠滋
堂中佳人雲珮垂
霞冠鶴帔光陸離麻姑盈盈進紫觴
東方小兒翱且翔
徐歌緩節宵未央明星煌煌應壽昌

其二

芙蓉朱蕤蘭紫芽含風被露齊
發花庭中象席連鳳珈
流輝照耀麒麟車麻姑盈盈進紫觴
東方小兒翱且翔

徐歌緩節宵未央明星煌煌應壽昌

望夫石

自君之出矣日日望君歸秋風吹紫塞夜夜擣寒衣樓
蘭未滅君不歸含啼獨自下重幃玉關西去路如棘安
得身隨鴻鴈飛食荼中自苦食蘗那忍食西風吹妾身
化作望夫石東海之水成丘山公乎何時生入關年年
風雨裏但見血痕斑妾心匪石不可轉君身如璧當來還

太白山人歌

吾聞太白之山橫絕沙磧東去天盈尺秦地雄陰厓古
雪吹烈風開闢以來如白龍赤日橫半度百草不發天
無功山中之人冰雪容飡霞吸露五內空綠雲結交河
上公壽三千歲顏如童北招汗漫南挾韓終椒丘縣圃
直天幾度拊膺捫畢天為通長髯下照滄海水玄虬跋
浪吹蒼穹視彼守株之徒奚啻黃鵠之與壤蟲吾將乘
元氣與君遊無窮

粵中元父歌

泉山老子金馬仙青陽溫風春可憐魚須奉帝三十年
角巾南首泉山前司徒起家青棘郎娟娟寒素臨秋霜
炯如白鳳從君王瑞文冥舉天地荒壺公山人見素子
頻年三出還三已玄文突兀凌太華峻節孤稜冠青史
木蘭江上弄煙水芻角雞香惡用爾中丞謇謇新齋公
麗如月露映梧桐白筆持裁陳素封殿前斥奸氣如虹
蒼蠅貝錦心不同中丞解纓猶潰癰蚤歲稱知犯公眼
酬知力共塘蒲晚齊州腥氛黯長夜飛騰願附冥鴻遠

玉龍手提不可成長歌一夕雲河傾

苦寒行二首

刀兵之餘氣不淑立春一月寒猶酷東日微微背腸谷
西風獵獵遺華屋吳儂號饑拜人前吳姬受凍啼門曲
去年冬雷折地軸

其二

南冠丈人何偪仄惡風吹雲閉春色白梅陰多開苦遲
黃鸝口噤啼不得東方征輪斷無迹嗚呼彼蒼未肯迴

天戎翻令絲絮專元功

河上行

白鴈噉噉思朔方烏衣逐逐度河隍
河間草樹色焜黃
淮西二月春悲涼北風慘慄日無光
洪濤簸天不可航
晨風下食百鳥藏妖虬怒鯨連山長
途遙日暮雨沾裳
臨河欲渡愁無梁散髮狂夫何郡郎
瑩篴絃絕聲不揚
側身天地夜未央愁燕愁粵熱中腸

少谷集卷三

欽定四庫全書

集部
少谷集卷四

詳校官庶吉士_臣李如筠

中書_臣劉源溥覆勘

總校官知縣_臣楊懋珩

校對官編修_臣沈清藻

謄錄監生_臣施華

欽定四庫全書

少谷集卷四

明 鄭善夫 撰

五言律詩

發京邑迷路投宿黑庄

東省多年病南冠
百念灰闕山一帳
望天漢獨歸來行
野蒲稗晚過村笳
鼓哀迷途更幾許
愁絕望鄉臺

夜入魯北鄙

不見黃花面淒其白鴈前清渠接淮泗衰草入幽燕月
露猶團夜兵戎更積年歸途不可極賸夢歲寒天

放船

施樓下急浪去險在毫端已識篙師巧方憂蜀道難此
溪防罔象何日避風湍頗羨玄真子清時把釣竿

泗上

總總衣冠地方冬生事繁牛羊散迥野煙火接長村薙
藿農人聚分瓜稚子喧如何惡官府鑿破此淳源

對湖二首

曄曄玄陰日團團照水隈鯨波動霄漢鼉鼓挾風雷地
盡青山杳天寒白鳥回輕帆未相失自此訪蓬萊

其二

遠水明如鏡平林渺欲迷天多足鴻鴈沙暖定鳬鷺秋
事闕身世湖聲避鼓聲老漁吾愧汝曼衍聽天倪

過彭城懷舊二首

自有干戈後年年向此過乾坤未解甲江海且增波拊

劍心逾壯經時鬢易皤渭南無夢到終是卧煙蘿

其二

憶昔此避地諸君慰我多別來淹日月望爾遯山河灑
淚山陽笛關心隴水歌猶聞殺長吏飄泊復如何

呂梁

蔥嶺崑崙外呂梁天地間溯騰終赴海咆吼欲頽山力
轉魚龍窟秋生虎豹關平生歷險阻對此淚潸潸

悼劉泌

宓也歸何處營魂不可招只疑天地濶竟作死生遙苦
海風濤壯炎方罔兩驕傷心卧佛寺秋雨自蘭苕

得思道消息二首

聞汝還家後逢時倣擾初艱難仍被寇墨經却離居邊
徼猶多故山園未可鋤棠陵幸襄事亦得慰區區

其二

近逢黃吏部報爾在三衢志士傷泥滓南州困猘猢時
危離索久歲晚帛書無却憶吳門約蕭條愧病夫

聞開化用兵寄思道

舊是桃源地如何喪亂滋荷戈連老少流血滿潢池蜀道奔惟汝荊州仗有誰尊翁在垂白莫遣怨流離

牛首

牛首有佳致方冬亦自奇同雲封地軸積雪糝松枝谷響傳鐘磬山昏泣罔魑憑高俯王土何意有旌旗

臘

南州不待律臘後暖相催久客惜殘歲他時聞落梅家

家斗酒會處處短筇哀却憶江西北漁樵戍未回

歸來

不作東曹屬歸來巾屨幽豈能効舐痔聊且避犧牛玉
木深防病瓶壘未省憂此邦蝦菜賤家室暫淹留

進衣

何處避冰雪頻懷負日暄未衰筋力憊獨立布衣存列
子愁居鄭袁安早閉門粵南多爽氣歸去牧鷄豚

兵起

自有西江亂流民起帶刀操差盡孺弱殺戮到耆髦敵
讎時猶獻軍需日更騷長纓未得請無計罷鞬索

錢塘

萬山赴海國衆水匯錢塘王氣千年歇湖聲八月長世
傳渾罔兩天巧亦荒唐稍待涼風發乘槎問彼蒼

即事

即事春相近回船日日操微陽留朔雪久旱失溪毛衢
府風煙改常山斥堠高危途疲繭客汨汨向蓬蒿

漫興

日月隨人事溪山共客情
水清魚避影松靜鶴留聲
枰怡前輩文章達後生
時聞扣牛角猶愧似要名

嚴州

小傳清江並孤城
碧嶂防土宜多竹
栢民業但耕桑
稻熟還官得山深
伐木長經過數州
郡淳朴見茲鄉

梨關

梨關不可上戰格屹雲端
閩浙乾坤別風煙道路難
隄

防莫蹙廢戎馬未全安謾想先皇日車書達百蠻

送王參知赴闕

大參行赴闕興落富春前六月樓船雨千山傳馬煙白
雲留故國綵服媚南天知爾寧親後屏營金鑑篇

畫鷹

似欲飛騰起星眸勢可招平生酣白戰遠志碍青霄竹
兔何愁得林樞不敢驕無由配鸞鳳勿以比鴟梟

憶近夫

吳門相失後書札各茫然巢父終東去劉郎重北遷雙
鳬赴魏闕獨鶴下青田未見風塵淨懷君涕淚邊

汨汨

汨汨傷秋髮依依欲暮年釣磯滄海上布被白湖邊避
地親朋棄憂時夢寐牽無家杜陵老且結草堂緣

梧兒初學語

梧兒生六月孩笑識人情得汝愁俱破于人眼盡青整
時聞學語何日見趨庭爾祖能看我回頭涕泗零

伏雨

漑漑猶鳴旦淒淒欲作寒
晚禾翻惡濕后土故長乾
敝屋久僵卧凶年甘糲飧
持觚向人世未得脫艱難

至日

至日風色好粵南霜信遙
地卑饒瘴氣春近茁寒條
汶水昔獨往淮南誰見招
林棲歲華晏難免鬢蕭蕭

冬日草堂小集

近郭風霜淺寒天草木稠
敝廬元僻野高馬漫淹留
豈

是草玄宅能迴訪雪舟生逢聖明世未敢杜交游

喜吾惟可訪少谷兼懷方令

舊國冥心久良朋見面初同為避地客獨叩草玄廬花
鳥三春暮乾坤百戰餘邇來方拙牧衰疾復何如

烏石惟可同遊

道山秀盤石春半更嬋媛海水雙江入巖花二月繁衰
容防草昧故老問桃源憐爾南遊思風煙數斷魂

寒食

至後百五日堂齋風雨深越鄉寒作食溟海氣長陰身
事南陽役神京北望心采薪纏日月髮已不勝簪

早秋龍門舟中

牒子小於葉早秋江上行風波千古轉天地幾時平病
骨憐滄海凡才耻聖明不眠聞短吹故國亦飄零

宿象山西塢二首

亂木藏幽鳥清商集古城暝煙分野意山鬼習人聲未
把桐川釣聊為潁水耕巖棲備寂寞儻得遇初平

其二

秋雲不稱意，膚寸每成霖。
漏日翻東壁，隨風濕遠岑。
腰鎌野外急，燐火晚來深。
入夜增蕭索，千林猿狖吟。

寄潘逸老

東湖潘逸老，守晦十餘年。
久病文園枕，長貧杜曲田。
形骸非故我，天地有真詮。
願汝支離德，閒居讀內篇。

海濱書所見

北里萬餘戶，漁樵更種田。
打魚乘水得，伐木上山便。
禾

黍稷南畝牛羊被遠阡生涯未為少何意盡顛連

卧病少谷山中

伏枕東山晚閉門黃葉幽竹書遺問歲蟬語易深秋散
地朋情見明時家食羞唯應習農圃草野得淹留

今夕

薊門城下月今夕定如何白骨凌沙磧黃塵控駱駝羽
書疲傳置邊馬失關河天子方宵旰孤臣淚已多

授衣

秋草條已歇鳴蛩欲近牀北風吹鬢髮九月進衣裳抱
病仍多事逃空未損光黑貂今久敝揺落歲寒妨

岳上送時行赴闕二首

王粲江湖興幡然為國謀故山隨意去殘照尚誰留身
事齊門怨天家漆室憂蕭條倍憐汝歲晚拂吳鉤

其二

念爾復赴闕迢迢思昔年雞盟盡豪杰天論老風煙病
向滄江卧書無白鴈傳平生鸚鵡賦萬一故人憐

草堂

歲事日將晏草堂今苟完
天風吟竹葉海月皓柴門
藜蒐還高志經綸有故園
何能謝貧賤氛祲在乾坤

寄林荆門

暮年滄洲客慟哭向窮途
春草生歸思秋風慰病夫
青羶後命達白髮此身癯
八月衡山去期君出五瀦

答安黃門

憐君下峽水寄我郢中吟
白雪音調遠黃牛風浪深
林

丘心獨苦歲月病長侵膠漆知何地迢迢鴻鵠心

讀鸚鵡賦

讀罷鸚鵡賦吾憐禰正平識機寧入網遠害轉傷生名
在心形累時危鼎俎烹異時一掬汨灑向武昌城

江上別道宗兼懷何仲默

却向江頭別潸然感物華林泉移歲月霄漢變雲霞伏
劍亦駭俗出門寧顧家寄言何水部遲爾折梅花

挽王生

吾鄉論後進爾最擅詞場十八人間世三千弟子行轅
駒未竟步石火不餘光憶昔邢居實秋風太惋傷

送伍方伯入覲

尊翁吾從祖同第甲申年論世鰕生願通家令子賢春
風虛木榻王事重樓船命薄徐高士栖栖不受憐

聞濤

漲海饒孤寐春山淹去歸魚龍永夜急波浪遠天違孤
志存舟楫清時卧釣磯塵機久已息何事白鷗飛

中秋同高宗呂傳木虛城東步月有懷京華舊遊
朗月團秋社涼風薄歲寒故鄉誰獨健永夜此同看隣
遽傷今昔山杯盡肺肝長安舊朋侶搔首五雲端

南關

度隴心忽折殊方梅柳春兵戈近滿眼書劍老隨身世
有阮籍淚道應原憲貧愁聞更選士東土已風塵

金山紀遊二首

雙眼無空濶長江會百靈吳門對海定淮樹貼天青鐘

動龜鼉窟雲生鶴鶴庭中流有孤志鼓柁下滄溟

其二

瀟瀟中冷水東遊與散愁樓臺通海霧歲月送江流好事憐司馬逃空想惠休獻花緣尚淺心折過揚州

不寐

客思苦不寐驚心豺虎喧羽書秋後捷鬼哭夜深魂歲月消殘燹風煙失故園彭城有弟妹締綵念溫存

阻濟上

叔伯何多日關山烽火明病妨風土惡身與歲時征喪
亂懷先帝艱危有我生向來劉越石意氣不能平

懷金山

我愛金山寺洪波萬頃開乾坤留柱石滄海失蓬萊曝
日龜鼉出搏風鶴鶴迴中泠洗心處極目意悠哉

此夕

時危長伏枕月好自臨關斥堠連吳越煙塵犯海山民
窮久欲亂師老未成班此夕姑蘇酒酣歌不破顏

雙鴈

雙鴈為人得堦前相向鳴已辭關塞遠猶帶網羅驚
宦情一片影客淚五更聲側目窺秋隼風煙異性情

對雪答太白山人

天地忽改色六花風亂投翛然翠袖薄加我草堂幽
照水梅自媚閉門君不憂玄機正無極將汝醉鄉遊

歲暮哭近夫二首

南國青瑣闥東山白板扉三年不相見兩地思依依
遂

有幽明隔誰云天壽微江東送望眼空復暮雲飛

其二

寧知是永別七月有書來即死還憂國皇天亦妬才世
衰元氣散君逝玉山頽滄海垂綸客冥心若死灰

海門

落日綿亭嶺茫茫何所之山川淪沆瀣天地撤藩籬脫
屣未相失放瓢聊自怡扶桑弱水外東望拂虹蜺

將至鯉湖道上

瑤宇青峰頂芒鞋白鳥邊風泉轟九鯉雲木薄諸天尚
子終當去龐公最可憐玄房今夕裏磬咳接羣仙

鯉湖三首

到此意了了春湖接未妨薄雲長戀洞名草不辭香月
色寒侵閣灘聲夜近牀神仙真可學吾即傲陶唐

其二

鐵嶂垂天塹石門修水關古松蟠極地小鳥立驚湍玉
笛何由聽真乘未即安芝田會心處漫憶紫金丹

其三

何處遁天弢煙霄首獨搔山川進奇崛天地入蕭騷病
骨憐芳草煩心愧白袍東隅紫氣盛偏薄上仙曹

春日經白沙王氏庄

王子躬耕處柴門碧樹團雲松飛鶴鶴風澗引波瀾父
老壺觴得兒童禮數寬西坡水麥熟麋鹿下安安

寄王時行僉憲二首

隱約王僉憲為官近越州久無烽火警能把甲兵休清

遠神仙所君王錫宴遊時平占福地不用覓丹丘

其二

囊山分手去正值暮春時蒲柳看衰颭風塵且別離嶺南人事少海上鴈書遲炎瘴還消息無勞罷酒卮

寄克之華亭

鰲峰衰病至歲月莽蹉跎不識松江曲鱸蓴意若何朋情音問濶師道課程多預報經過日秋風偃敗荷

寄鄭方伯山齊

昔日莆陽役春山共採芝鄭虔猶逐客賈傳自明時潦
倒鶯花切提携酒饌隨難忘何氏宅汎愛木蘭陂

聞汀漳罷兵二首

整整汀漳戍羣兇復聽招頻聞洗兵馬不見返漁樵猥
猥終難狎獍狝漫獨驕皇情近憂豁氛祲若為銷

其二

羽書傳上國牙帳擁諸侯別峒分戎馬前鋒失火牛果
誰知要害漫爾歷春秋只道書生策能分主上憂

同林九高二傳二施二避暑越王城樓

長夏升炎赫高城遁鬱蒸河隍虛雉堞雲日造松陵不
去稽康達同遊賈島能愧無隣舍酒率爾集良朋

見二毛

去國星霜變違時老憊成荒迷一身在汨沒二毛生世
短思飛鳥途窮乞步兵昏塵干氣象溝壑未忘情

將別

多事晉安郡浮生未息機草堂存下着花徑罷初衣江

海形容在君王夢寐稀
隆中棄汝去勛業願無違

白袍

白袍存皎潔傍爾竹林人
安得綠玉杖長隨烏角巾
莊生書是憤阮瑀行能純
易俗吾奚敢將無養道真

夜熱次林九二首

中宵猶酷熱初伏未秋風
汲井分寒水休燈散羽蟲
宦情深自損肺氣更相攻
象魏天蕭爽衣冠日會同

其二

雷霆慳小雨巖谷斷微風北雪陰山裏南州大火中迎
秋草木異愛月女兒同內熱兼多病賡歌愧未工

丹青閣

建州丹青閣清切建城西雲棧浮高壁風松出逶溪水
枯沙漠漠秋晏樹淒淒多壘關山裏銷憂聊杖藜

登建州浮屠訪僧道林

浮屠秋獨立千里見氛祲水閣風長盛山城日易陰赤
霞留鶴晚黃葉住僧深世事宜高卧空慙支遁林

再遊陶園

太僕遺榮在黃華晚見招鑿池旋日月洗竹直雲霄
賓客時能至園林跡許遙高秋花雜沓勝地不蕭條

暮秋

旅情秋又暮長路更旌旗王氣平三極兵塵黯四夷
拙慙名已晚病恐志將衰許國微軀在崎危善自持

鴻鴈

稻粱荒歲月鴻鴈散江湖避地風霜切防身機辟俱不

愁天曠絕長恐事榮枯二月陰山暖歸心慰遠途

北征

五年歸少谷萬里赴燕臺
總闕鬢毛改感時鴻鴈來
魚龍已寂寞江漢尚喧喧
遠愧青蓮士君王愛爾才

章灘

九月章灘水危於灩澦
堆黃郎習波浪白日犯風雷
鳥獸曾何有蛟龍或上來
畏途荆棘暗此地石門開

憶四弟二首

出門憂汝病清淚至今垂鴻鴈莽相失眷令空爾思未
依南郭隱真怪北山移夜雨燈明裏商歌一拊髀

其二

驚馬心猶壯龍駒產不虛吾衰今更去汝病近何如烽
火淹魚素關山杳羽書橫門思一出此意幾躊躇

崙溪對芙蓉懷林九王七

脉脉崙溪雨芙蓉傲遠天時危花爛熳歲晚葉逡巡對
影會相憶看他亦自憐秋容長不減吾欲贈佳人

寄宗呂

高適不早達才多數亦奇名應造化忌狂與世人疑妻
子已同志簞瓢長自怡箕山好風月將汝結茅茨

寄林惟大

不了林和靖遐心駐薜蘿星文天上有書法世間多獨
鶴聞清夜踈梅渡暗波滄灣餘故宅猿鳥近如何

憶道夫

玉山建亥月漫憶十年前舊驛同吟雪諸君盡着鞭客

途猶戰伐南楚自風煙異域懷知己沈淪爾最賢

寄木虛

吾弟知名早鋒稜不可當交情有端復文體下齊梁霜
驥時猶蹶風鷹勢必揚嵩山讀書處煙雨壓茅堂

雨後陪周用賓杖策尋天目祖花

風雨於潛道藤蘿古殿陰祖花傳近代瑶草寄遐心應
世吾能賦探玄女獨深形骸百鍊晚未免二毛侵

山中對孫太初食黃精

山中黃精熟作意向山人製法隨蒸曝靈根集鬼神腹
心吾尚病服食爾能純有客乘雲氣三尸不累身

十一月朔日登西天目看高峰中峰二神僧祖塔
因眺千丈巖尋雷起處折古松枝扣巨石長嘯天
風蓬蓬從谷底起偃仆草木投宿張公洞枕上漫
爾成詩

汨汨衰雙鬢迢迢向兩峰一塵消未了萬劫入無窮昧
谷蛟龍雨玄冥草木風自慙增上慢吁駭問崆峒

歲暮尋天台山水

桃源未可極天台煙霧深行歌白雪調坐見赤霞心
草次千峰會鴻蒙萬壑陰藏身一大事聊觀世人音

台州觀海二首

獨客長途破孤城幽思多入山忘日月觀海失江河
萬事只垂釣故園未偃戈平生挾弧矢流落意如何

其二

迷陽不自覺春遠此登樓落日鯢鵬運一掬天地浮白

波心不變青鳥信何由八駿浮雲裏平居端百憂

鴈宕讀壁間詩侯希召云此陳準卿之作也昔與
準卿為月夜遊仰觀天柱諸峰岌岌如墜發狂大
叫自以為奇觀今茲已矣相顧歔歔賦此酌之

鴈蕩清猿夜黯然讀爾詩斯人竟短折吾道日支離二
谷看秋月孤峰落酒卮細繡嘉樹傳灑泣向臨苗

觀鴈宕龍湫

瀑布飛不徹大聲空谷哀青山下河漢白日莽風雷潭

穩蛟龍定歲深鴻鴈來方巖倚天畔吾志在崔嵬

潘令席上作軍中樂

張筵潘岳縣笳鼓競黃昏楊柳生南國風雲動塞垣揮
戈情可念擊楫氣猶存漢主白登道甘心出玉門

贈顧華玉太守

客有飄飄者竭來湖海遊雲端尋鴈蕩雪裏過台州白
業藏賢達浮槎近女牛豐干漫饒舌太守是閭丘

郡齋燕集答華玉二首

赤城天欲雪歲暮客邊心君子風騷遠良宵尊俎深旅
懷新浩蕩時事向蕭森作意依劉表移家近漢陰

其二

梁園初授簡越客罷鳴琴節序梅花及江湖鴻鴈深雪
歌難却和醴酒若為斟何限山陰興幽居獨許尋

春日發赤城

碧海春信至赤城愁思深雪晴千澗疾日落萬方陰畢
歲皆行役凡軀故滯淫西歸負良友忽爾長蓬心

浙江別王崇賢

避亂安平鎮逢君永夜船何堪萍水跡直落浙江邊天
子今巡幸崆峒積歲年憂心正如搗况聽卜居篇

江上贈汝厲侍御之荆湖

浙水重逢地閩州舊話稠雷霆喧獨夜風雨動三秋騏
驎行堪見鷹鷂擊更優他時有諫草知上岳陽樓

登太山日觀峰

東岳乾坤定黃河一縷分日排瀛海浪天入薊門雲魯

道傷吾志秦碑自久曛未堪疏遠目萬里正祲氛

遣愁

問途青草坂捩拖白榆林暑雨東方急河泥五月深低
回長棄馬淹泊未棲禽商調何悲切從誰覓賞音

北風

北風天際下舟楫夜相聞白草懸邊月黃沙長塞雲鸞
旂猶小隊虎旅盡高飭崖崿睽乖久人今已勒文

隱憂

四海俱疲敝中原且力支路難惟蹭蹬心苦有棲遲草
澤龍初闢天山矢更遺無由濟社稷哽咽送年衰

出門

去國淹年歲出門仍糾紛未回塞翁馬空有野人片山
海隨黃纛風雲駐五軍遠慙東方朔談笑諍明君

滄洲夏夕

失意對蒲柳滄洲昨夜風野雲依暮笛客況近秋空司
馬多年病虞卿薄暮窮此生隨造物行止合飄蓬

對月懷閩中諸子

潞河今夜月却望晉安城少谷堂猶在東峰花正明旅
愁存世故鄉夢逐人情展轉懷諸子風沙吾獨行

大田篇二首

內使調鷹犬呼聲動遠陲萬方多事後千騎大田時關
塞回金氣旌麾把健兒璜溪垂釣者能載副車來

其二

禁直三千士長拳鎮國旗甲戈迷塞月繒帛款邊師大

禮初回蹕春原更打圍後車載光寵不數漢昭儀

夢惟可為余作山中草堂

天末夢君子山中營我廬江湖無利涉家室且安居梅
福機事早鄭虔生計疎京塵今始便騎馬亦樵漁

秋晚直南省二首

南宮秋晚直更鼓不勝殘鴻鴈夜仍度風霜天正寒宮
車延北望越客滯南冠三輔烽煙裏聞鷄未敢安

其二

清宵夢不徹鴉啼深樹間
要荒同漢月陵寢在燕山
青草乘時長黃荇何日還
因風候邊使咫尺見天顏

送汪希會還武昌題得彭蠡

彭蠡何時定康郎水尚多
魚龍冬不蟄日月歲相摩
楚客思芳草江城未凱歌
星檣候風色安穩犯鯨波

黃巖黃宗賢為余築室羽山
招與共棲未果守官
鬱鬱輒有東路之思奈故鄉
多難欲歸不可行當
赴其招矣記興二首

不分委溝壑上林安一枝官隨年少後拙負故人知
鼎終難就簞瓢定不辭故園方苦亂去採羽山芝

其二

萬事無何有風雲信所為此生依鮑叔何處覓鍾期
騷懷長路芙蓉惜後時嗣宗元玩世不恨步兵遲

答孫太初

平生孫處士雲水誼難忘遁世思公輩卜居真此鄉
名高多寂寞道在亦翱翔徐福終入海蓬萊意甚長

答林德敷

曼倩淹平世揚雲困太玄此生元獲落夫子最相憐跡
逐捐金市心卑扣角篇鯢桓去不遠脫屣歲寒天

月下聽王稚欽彈琴

昭文鼓綠綺六氣指間流王子梅花思飄飄下隴頭月
華終勝雪商意自成秋今夕西方夢佳人不散憂

送陳生赴韶州戎幕三首

閩海三山下韶州五嶺南東風鷗首去長路馬蹄諳蠻

井歌堪聽軍門劍可談丹砂真易得吾欲解朝簪

其二

月下棲烏樹天邊過鴈羣生涯隨逆旅幽獨倍憐君百
粵茲多難今時未尚文南遊得蠻府愁殺郝叅軍

其三

已息河間轡仍麾嶺外旌艱危一命寄牢落二毛生銅
柱時存漢烏蠻歲厲兵憑將攻守策忼慨說花卿

讀魏鈺詩

魏鉦新聲出篇篇有古風夜珠光照乘天馬勢行空邑
宰深相識經生本自窮昆城依隱地祇憶鹿皮翁

邊將

十月黃沙動陰山白雪高邊兵憑剽殺漢馬辟雄豪王
道須無外天戈自有操莫令耕稼地歲歲泣弓刀

弔劉蕡祠

自昔悲歌地劉生有墓祠祇餘經世志况值諱言時去
國英雄盡還山事業遲黃金舊堂北搔首動遐思

寄徐可大黃門

往年遊白下汎愛有徐卿令弟今相問憐君久振纓歲
星還自照諫草未全行謝傳東山卧秋風社稷情

寄汪令希舜

彭門當太白劍閣帶青城此地神仙窟春風枳棘情桃
花栽欲遍蜀道去還平知爾丹成日雙鳬凌紫清

送人遊衡山

衡山開漢沔高者祝融峯羨爾為官地看雲長道容齋

居夢波浪冬日見魚龍定有冥棲客巢君紫蓋松

送龍相赴榮府

去為朱履客瀟灑向王門君有神仙質官曹入故園乘
風帝子閣種术武陵源莫弔長沙傳荆蠻處處援

白鶴

廣野聲仍度華軒意不忘只疑霄漢遠其奈網羅長宿
處隨鴛鴦鳴時學鳳凰終當蓬闕去天路永翱翔

冬夜過王稚欽

禁木樓烏盡城樓戍鼓催暝移中散駕時接仲宣才道
術吾全未詞場力擬迴清風廣陵散愛爾數能來

贈宋鴻

憐君羽翼晚矯矯若驚鴻夜躡燕山雪春生楚澤風霄
漢去不極稻梁行常逢遐方倦飛鳥猶自觸樊籠

題夏仲昭畫竹

蒼梧春欲至翠篁風雨深雲梢灑不亂流影下湘陰杳
矣虞妃淚悠哉君子心鳳凰去已久對爾想遺音

人日得諸友書六首

歲晚通明閣登臨念我深故山歸未得叢桂蔚森森人
日雙魚信遠天黃鳥音如何莊舄貴翻動越鄉吟

其二

聞爾浮南海鯨波隔歲回翻將謝傳興轉作步兵哀地
到朱方盡舟從日下來交州拾蕙苴誰識葛仙才

其三

吾愛方山老巖崖湛世情成都賣卜久不道是君平文

陋齊梁體音收正始名赤霄天驥步他日與橫行

其四

女方尋九鯉余苦憶丹丘冀英生無盡瑠花采未由兔
園枚叔侍牛渚客星浮杳杳孤槎外相思天漢流

其五

不跨山公馬春今薛老峰前時紫芝曲尚繞白雲中霄
漢慙棲棘泥沙想蟄龍明朝解組去共醉薜蘿叢

其六

爾同鄴下士染翰擅詞場余豈東方朔猶含漢署香放
身滄海上得句白蓮塘遲暮思君子春來數鴈行

送人遊鄴下

鄴城魏七子文藻亦吾師四牡君今去風流端在茲荒
蕪銅雀榭寂寞武安祠獨有韓陵石黃沙歲歲吹

部直

春懷耿不寐悵望宛京天鶴到中宵唳星分萬井懸燕
雲時少耗郊禘日虛傳常想南昌尉先存諫諍箋

送張汝州

汝水元依洛嵩山直配天
今君簿領去兼結水山緣
世路黃塵裏官曹紫邏邊
誰能廢組綬跨鶴去翩翩

聞道

聞道漢天子身封鎮國公
家初營上谷臣得賀離宮
鐵券傳何急將軍氣盡雄
郊牛凡五卜車駕想河東

送陳思獻赴金陵

昔慕蔡夫子今知陳使君
深居避矰弋用志到羲文
却

向金臺別翻將寶劍分秣陵依隱地養拙幸相聞

河隴

河隴時多事兵車歲幾奔猶聞遣太僕長計向軍門羌
羯方酣戰驛驢盡不存西歸報天子已到渥洼源

西山雜詩三首

春盡一到此散愁幽意繁西湖草已綠南國桂應蕃宮
殿浮今日山河控北門時艱羨飛錫來往給孤園

其二

昔日西湖釣宣皇遊幸來至今鮫室裏彷彿錦雲開歲
月芙蓉殿關山龍虎臺東巡志更遠誰挽八鸞回

其三

西山五百寺多傍北邙岑土木春巖盡樓臺海霧深僧
皆傳玉食地更壘黃金縱目翻愁極長安歲歲陰

送洪南安

平生洪大理樸直古人心執法漢庭上春風吹六陰一
麾橫浦去相失庾山深他日逢梅使聽歌行路吟

伍中丞擬歸田索題

伍公江海思魚鳥久相安擬逐鷗夷去翻憐鋈冑冠
蘿雲藥圃細竹月錦堂寒矍鑠風塵裏憂時且據鞍

周公器弘治初為慶符令賦詩追憶之

周君為邑日江漢盡桑麻帝力誰知識長安無狹斜但
將九溪水頻灌慶符花遥想彈琴處南風吹未涯

余侍御珊喜湖

柱史湖邊宅柴扉開皖峰晴天迴鶴鶴暮水迴魚龍菱

服身偏穩漁竿意可慵
眼中秋浩蕩為爾咏芙蓉

西山雜詩

落日春湖上煙波正渺茫
衣冠非敢倚魚鳥坐相忘
痛飲還山簡招攜有葛疆
濯纓計未得意氣總滄浪



少谷集卷四